

MUN BILONG BUK BAIBEL 2020

Bleset Pita ToRot

was santu bilong ol manmeri
bilong Papua Niugini



LONG
DISPELA
YIA 2020
YUMI
SELEBRETIM
25 YIA
BILONG
PITA TOROT
I KAMAP
BLESET,
OLSEM NA
YUMI LAIK
TINGIM EM
NA TOKTOK
LONG
SAKRAMEN
BILONG
MARIT!

Dia ol pikinini:

Long dispela yia 2020 yumi selebretim 25 yia bilong Pita torot i kamap "Bleset". Dispela tok "Bleset" i min olsem klostu Mama Sios bai i makim em olsem santu, olsem na yumi olgeta i amamas tumas! Yumi mas tenkim God, long wanem wanela wantok bilong yumi bai i kamap

santu wankain olsem ol arapela santu yumi save tingim ol long taim bilong beten!

Olsem na long Baibel Mun yumi laik toktok long tupela samting: pastaim yumi laik toktok liklik long sakramen bilong marit, long wanem Pita torot i bin dai olsem martir bilong givim witnes long sakramen bilong marit. Na tu yumi laik toktok liklik long stori laip bilong Pita torot yet, na tingim gen ol gutpela pasin em i bin mekim.



SAKRAMEN BILONG MARIT EM I WANEM SAMTING?

Sakramen bilong Marit em i wanpela sakramen Jisas yet i bin kamapim. Yumi save pinis olsem ol 7-pela sakramen bilong Katolik Sios i kam long laik na tingting bilong Jisas, olsem na Jisas yet i bin kamapim ol.

Orait, sakramen bilong Marit em i dispela sakramen i save mekim wanpela man i pas wantaim wanpela meri, na God yet i pasim tupela na blesim tupela, bai tupela i ken kamapim wanpela famili na sindaun gut wantaim inap long indai. God i amamas tumas long ol man i kisim meri na kamapim planti pikinini na sindaun gut olsem famili.

Nau yumi toktok liklik long stori bilong dispela sakramen...



STORI BILONG SAKRAMEN BILONG MARIT



Long bigin tru bilong Buk Baibel i gat stori bilong God i kamapim olgeta samting. Buk Baibel i tok olsem God i bin kamapim san, mun, skai na graun, wantaim olgeta samting i stap long ol. Em i pulapim dispela graun wantaim planti naispela samting, olsem ol maunten, ol bikpela solwara, ol diwai, ol animal na planti kaikai tru. Na taim God i bin kamapim olgeta samting pinis, orait em i kamapim yumi, ol manmeri, bai yumi ken

laikim em na harim tok bilong em oltaim, na tu bai yumi ken bosim dispela graun na stap gut.

Na stori bilong God i kamapim yumi em i olsem:
pastaim God i kamapim namba wan man, nem bilong em Adam. God i amamas tumas long em, long wanem em i winim olgeta samting bipo God i bin mekim. Tasol God i lukim Adam i stap wanpis tasol, olsem na em i pilim sori long em, long wanem i no gutpela long man i stap wanpis. Olsem na Buk Baibel i tok: *“Na God, Bikpela i tok olsem, ‘Em i no gutpela long dispela man i stap wanpis. Mi mas mekim kamap wanpela poroman bilong helpim em.’ Orait God, Bikpela i mekim man i slip i dai tru... na*

God i wokim wanpela meri na bihain em i bringim meri i go long man. Man i lukim meri na em i tok olsem, ‘Em nau. Em i poroman tru bilong mi... God i wokim em long bun bilong mi, olsem na bai mi kolim em ‘meri.’ Olsem na dispela pasin i kamap. Man i save lusim papamama na i pas wantaim meri bilong em, na tupela i kamap wanpela bodi tasol” (Stat 2:18-24).

Na bihain God i tokim tupela olsem: “Yupela i mas kamap planti na i go sindaun long olgeta hap bilong graun na bosim olgeta samting i stap long em” (Stat 1:28).

Olsem na Adam i kisim Iv olsem meri bilong em, na God i amamas tumas long tupela na blesim tupela.

I no longtaim God i blesim tupela wantaim planti pikinini, na tupela i kamapim namba wan famili bilong dispela graun.



**STORI BILONG
ADAM TUPELA
IV I SKULIM
YUMI OLSEM,
GOD I KAMAPIM
SAKRAMEN
BILONG MARIT
BAI OL MANMERI
I KEN KAMAPIM
WANPELA
NAISPELA
FAMILI!**

JISAS NA SANTU MARIA I AMAMAS LONG OL MANMERI I SAVE MARIT

Jisas na santu Maria i save laikim tumas ol famili, olsem na ol i amamas tumas long ol manmeri i save marit na kamapim ol gutpela famili! Na long Gutnius bilong santu Jon, i

gat stori bilong Jisas i wokim namba wan mirakel em. Na dispela stori i tok olsem: Jisas wantaim mama bilong em, Maria, na wantaim ol disaipel, ol i bin go long wanpela marit i kamap long taun Kana, long Galili. Na taim ol i kaikai stap, orait ol i sot long wain, olsem na nek bilong ol manmeri bai i drai. Maria i luksave long dispela samting, na em i pilim bikpela sori long man na meri i bin marit, olsem na em i askim Jisas long helpim tupela. Gutnius i tok: ***“Long dispela haus i gat 6-pela bikpela sospen ston i stap. Wanpela wanpela inap holim samting olsem 100 lita wara. Orait Jisas i tokim ol wokman olsem, ‘Pulimapim wara long ol***





sospen.’ Na ol i pulapim ol tru. Na em i tokim ol, ‘Kisim sampela nau na karim i go long man i bosim kaikai.’ Orait ol wokman i kisim sampela na karim i go. Dispela wara i kamap pinis olsem wain na man i bosim kaikai i traim, tasol em i no save, ol i kisim dispela wain we. Ol wokman i bin pulimapim wara, ol tasol i save” (2:6-9),

Dispela mirakel em i namba wan mirakel bilong Jisas, na em i wokim bilong helpim wanpela man na meri nau tasol i bin marit. Olsem na dispela stori i soim yumi olsem Jisas na santu Maria i save helpim ol man na meri i marit, na tupela i amamas tumas long man na meri i kamapim wanpela gutpela famili! Olsem na oltaim Jisas na santu Maria bai i helpim ol famili!

6-PELA GUTPELA TINGTING BILONG HELPIM OL PIKININI

Dia pikinini.

Sapos God i no singautim yu long kamap pris o sista, orait wanpela de yu tu bai i marit, wankain olsem papa na mama bilong yu. God yet i bin putim laik bilong kamapim famili insait long bel bilong yumi, olsem na wanpela de yu tu bai i pilim bikpela laik long painim poro bilong yu na kamapim wanpela famili. olsem na nau mi laik givim sampela gutpela tingting long yu, bai yu ken skelim gut pastaim.

1- Namba wan samting, yu mas pre na askim God long helpim yu long painim wanpela gutpela poro.

2- Yu mas skelim gut ol pasin bilong poro bilong yu. Sapos em i save bihainim Jisas gut, orait em bai i gutpela poro bilong yu. Sapos em i no save bihainim Jisas, orait em i no gutpela poro bilong yu.

3- Yu mas save gut olsem: sapos poro bilong yu i no

save rispektim yu, o sapos em i save paitim yu, o toknogutim yu, o bikmaus oltaim long yu, orait ol dispela pasin nogut bilong em i soim olsem yutupela bai i no inap long sindaun gut wantaim, olsem na mobeta yu mas lusim em hariap.

4- Yu mas bihainim klinpela pasin oltaim, long wanem dispela pasin em i bikpela samting tru long ai bilong Jisas. Na tu klinpela pasin bai i helpim

yu long kamapim wanpela gutpela famili.

5- Yu mas konpes na kisim **Santu Komunio** oltaim, long wanem dispela tupela sakramen i save givim grasia long yumi bilong stap gut na i strongim yumi long bihainim Jisas gut.

6- Yu no ken lustingting olsem dispela poro bai i stap

wantaim yu inap long indai bilong yu. Sapos yu maritim poro bilong yu, orait em bai i kamap papa o mama bilong ol pikinini bilong yu, olsem na yu bai i stap wantaim em inap long indai bilong yu, long wanem Jisas yet i tok: *"samting God i pasim, orait ol man i no ken katim"*, olsem na yumi no inap katim marit.



LAIP STORI BILONG BLESET PITA TOROT



Mama i karim Pita ToRot long yia 1912 long ples Rakunai. Taim Pita em i liklik pikinini yet, papa bilon em i bin skulim em long planti gutpela pasin. Long yia 1930 Pita i go kisim skul bilong kamap katekis, na long yia 1933 em i kamap katekis bilong ples bilong em yet.

Long 1936 Pita i maritim wanpela meri, nem bilong em Paula la Varpit, na God i blesim

tupela wantaim 3-pela pikinini. Paula em i wanpela gutpela meri, na oltaim em i save harim ol tok bilong man bilong em. Olsem na tupela i amamas na sindaun gut wantaim.

Long yia 1942 ol ami bilong Siapan i kam long Papua Niugini, na wantu ol i kalabusim ol pater na ol sista, long wanem ol Siapan i no Katolik, olsem na ol i les olgeta long ol misenari. Na taim



ol Siapan i kam bilong kalabusim peris pris bilong Rakunai, orait em i makim Pita ToRot long go pas long peris. Olsem na Pita i givim em yet olgeta long God na em i bin wok hat bilong strongim bilip bilong ol manmeri bilong ples. Pita i save visitim ol sikmanmeri, na em i save redim ol manmeri



bilong kisim ol sakramen. Em yet i bin baptaisim planti pikinini na witnesim planti marit i bin kamap insait long ples.

Ol Siapan i haiden, olsem na ol i no save rispektim sakramen bilong marit. Ol i save kisim namba 2 na namba 3 meri, na dispela pasin em i rabis tru long ai bilong Jisas. Olsem na Pita i strongim ol Katolik manmeri long

bihainim ol lo bilong marit, na long abrusim ol pasin doti bilong kisim planti meri. Na taim ol Siapan i

harim olsem Pita i wok long egensim ol, orait ol i kros nogut tru long Pita! Tasol Pita i no pret long ol, long wanem em i save olsem **yumi mas harim tok bilong God tasol, na yumi no ken brukim ol**

mandato bilong em.

I no longtaim ol Siapan i kam na kisim Pita ToRot i go long kalabus. Wanjela de mama bilong Pita i kam long kalabus bilong visitim em, na Pita i tokim em olsem: **"Mama, mi redi long dai. Mi no pret. Mi no laik givim baksait long Jisas"**.

Long de stret bilong indai bilong em, em i tokim mama



bilang em olsem: "Wanpela plisman bilang ol Siapan i toksave long mi olsem wanpela dokta bai i kam na givim marasin long mi, tasol mi no sik. Mi tingting em i wanpela trik tasol."

Long dispela de stret wanpela dokta i kam na givim marasin long em. Ol i givim wanpela sut long em, na dispela sut i gat poisin. Dispela poisin i no wok hariap, olsem na Pita i lusim laip bilong em isi isi tasol. Na taim Pita i dai pinis, orait wanpela plisman i go long ples Rakunai na toksave long olgeta manmeri olsem: "Katekis bilang yupela i dai pinis". Ol wanblut na ol pren bilong em i kisim bodi bilong em na planim long matmat long ples Rakunai yet.

**LAIP NA INDAI BILONG PITA TOROT I SKULIM
YUMI OLSEM, SAKRAMEN BILONG MARIT EM I
HOLI TRU, OLSEM NA OL MANMERI I NO INAP
KATIM! YUMI TU I MAS REDI LONG LUSIM LAIP
BILONG YUMI, TASOL YUMI NO KEN MEKIM SIN
NA PASIN DOTI LONG AI BILONG GOD!**



LCI Goroka
Biblical commission